

Iggissakkut kræfteqarneq





Imarisai:

- 5 Aallaqqaasiut
5 Igissakkut kræfteqarnermut suut malunnaataappat/
ilisarnaataappat?
6 Misissuinerit suut ingerlanneqassappat?
7 Misissuinerit allat
8 Qanoq napparsimatigaanga?
11 Katsorsaariaatsit suut atorneqarpat?
11 Pilatsinneq
12 Pilatsinneq ajornaraangat nakorsaasiisoqartarpoq
12 Qinngortaaneq
12 Kemoterapeerneqarneq
14 Qinngortarneqarnermik kemoterapiimillu
ataatsikkut nakorsaateqartitaaneq
14 Iggiaasalersinneq
14 Siunnersuutitsialaat
15 Katsorsartinnerup kingunerisinnaasai suuppat?
15 Pilatsinnerup nassatarisinnaasai
15 Pilattartinnerup kingunipilui
16 Qinngortartinnerup kingunipilui
16 Qinngortartinnerup kingunipilui ataavartuusinnaasut
16 Kemoterapiip kingunipilui
17 Kemoterapiip kingunipilui ataavartut
17 Qinngortaanerup kemoterapiillu ataatsikkoortillugit
nakorsaatiginerini kingunipilusuusinnaasut suuneri
17 Katsorsartinnerpit nalaani sulisut oqaloqatigikkit
18 Allatut katsorsaariaatsinik peqarpa?
18 Misiliutaalluni nakorsaatissinneqarneq
18 Misileraataasumik katsorsaaneq
18 Periaatsit ilisimatusarnikkut akuerisaanngitsut atorlugit
katsorsaaneq
19 Katsorsartinneq qaangiuppat qanoq pisoqassava?
19 Misissortinneq
19 Nappaatip nangeqqinnissaanut ersissuteqarneq

- 20 Ajorunnaassaanga?
20 Naatsorsueqqissaarneriit qanoq takussutissiippat?
21 Iggiaq qanoq atuuffeqarpa?
22 Kræfti peerneqarsinnaangippat taava?
22 Iisiuminaatsitsinerup qanoq iliuuseqarfingisinnanera
23 Nangeqqinnermi katsorsarneqarneq
24 Sooq iggissakkut kræfteqalersoqartarpa?
24 Nammineq qanoq iliuuseqarsinnaavunga?
24 Nerisat timersornerlu
24 Pujortartarpit?
25 Pujortarunnaarnissamut ikiorneqarusuppit?
25 Aalakoornartutorpallaarpit?
26 Aalakoornartutornerup allanngortinnissaanut
ikorneqarusuppit?
26 Peqqinnissamut Qullersaqarfiup aalakoornartutornermut
killigititai
26 Sumi ikiorneqarsinnaavunga imaluunniit
siunnersorneqarsinnaavunga?

Aallaqqaasiut

Inuit amerlanersaat kræfteqarnertik paasigaangamikku annilaarujuussuartarput. Qisuariaatit assigiinngeqaat. Amerlasuut annilaangasorujussuanngortarput toquニissartillu eqqarsaatigeqqajaalersarlugu. Inuit ilai soriusissaarutivit-tarput, suullu tamaasa artornartutut upperiuminaatsutullu isigilersarlugit.

Allat nappaatertik katsorsartinnissartillu qanoq iliuuseqarfinginiassallugu pilersaarusrusiorfigilertarpaat.

Iggissakkut kræfteqarneq imannaanngitsuuvoq, taamaattoq katsorsarne-qarnissaata pitsangngorsartuarnissaa pillugu ilisimatusartoqartuarpoq.

Aamma kræftimik qaangiisinnaajunaareersimasunut ikiutissanik ilisimatu-sartoqartuarpoq, soorlu nappaat suli atoraluarlugu qanoq inuusoqarsinna-neranik.

Una atuagassiannguaq apeqqutinut nappaammut katsorsarneqarnissamullu tunngasunik akissutissanik imaqarpoq.

Iggissakkut kræfteqartut tamarmik immikkut assigiinngeqisunik atugaqartar-put. Taamaattumik nakorsaq ilinnut katsorsaasoq illit nappaatinnut tun-nasunik apeqqutinnut akisinnaalluarnerussaaq.

Iggissakkut kræfteqarnermut suut ilisarnaataappat?

Iggissakkut kræfteqarnermut malunnaataasut/ilisarnaataasut inummiit inummut assigiinngissinnaasunik malunniuttarput. Ilisarnaatit amerlasuut allatigut aseruuttoornernut naviananngitsunut assersuunneqarsinnaapput. Ilisarnaat nalinginnaanerpaasoq tassaavoq tupittuusilluni iiiuminaatsitsineq ingasatsikkaluttuinnartoq. Taamaattumik amerlasuut napparsimasinnaaner-minnut pasitsaqqaarneq ajorput tupittuusinertillu pillugu nereriaatsiminnik allannguisinnaallutik, soorlu tamussernikillinikkut, tamualluartalernikkut iggisersornerulernikkullu. Sakissakkut anniарneq, iggiarluttutut nipeqaler-neq, tupittuusineq imaluunniit sitsoqittalerneq iggissakkut kræfteqalersima-nermut ilisarnaataapput.




Misissuinerit suut ingerlanneqassappat?

Iggissakkut kræfteqarsinnaanissat pasitsaanneqarpat nakorsavit annertunerumik misissugassanngorluitit immikkut ilisimasalimmut imaluunniit napparsimmaivimmut innersuutissavaatit.

Tassani qinngutaasamik assiliissutitalimmik atortulerluni iggissamik misis-suisoqassaaq ledningitut ittoq nuumigut qaammartartulik iluaqusiullugu.

Taamak misissuineq immikkut taaguuteqarpoq gastroskopi-mik.

Qinngutaasaq qanikkut mangullugu iggissamut aqajaqqumullu ingerlaartinneqassaaq. Taamatut misissuinermi iggissap ameraasaaniit aamma na-korsaq misissugassanngortitassamik ilanggarsisinnaavoq. Taamatut misis-sugassamik piigaqarneq biopsi-mik taaguuteqarpoq.



Misissuinerit allat

Iggissami kræftip tinumasortaata qanoq angitiginera kiisalu kræftip siaru-aassimanera misisorniarlugu assileeriaaseq alla atorlugu misissuisoqassaaq, tassa nipip maligaasai tusarsaanngitsut atorlugit assiliutigaluni misissuineq ultralyds-endoskop-imik taasaq atorlugu assitigut misissuisoqassaaq.

Imaappoq ledningi qanikkut manngullugu iggiaq aquasarlugu misissuisoqassaaq.

Pilaasoqassatillugu ilaatigut pisariaqartarpooq nassat aamma ilanngullugit misissornissaat. Tamanna laparoskopi atorlugu misissorneqartarpooq.

Taanna misissueriaaseq misissuutit marloqiusanngortillugit, tassalu qinngortaat asiliissutitalik nipillu maligaasai atorlugit misissuutip naakkut putunngualioriarluni qinngortaalluni misissuineruvoq.

Tarrarsuineq CT-Scanning aamma atorlugu misissuinerup takutissinnaavaa kræftip tinumasortaa qanoq angitiginersoq, sumi inissismarpiarnersoq kiisalu kræftip qinersinut, puannut tingunnulu siaruaassimanera taamaaliornikkut takuneqarsinnaalluni.

Quersoruluttaruit imaluunniit anersaartuutikkut ippigusuuteqaruit aamma tamanna ilanngullugu misissorneqassaaq bronkoskopi atorlugu.

Imaappoq CT-Scannerneqarninni takuneqarsinnaappat puakkut ippinnartoqartoq taava assiliissut ledningitit ittoq atorlugu anersaartuutit sulluinik misissuinikkut takuneqarsinnaassaaq, kræftip tinumasortaa puannut siaruaassimanersoq. Misissuineq iluatsillugu aamma nakorsaq misissugassamik ilanngagaqarsinnaavoq.

Qanoq napparsimatigaanga?

Nappaativit peerneqarsinnaanera aamma peqqissartinnerpit pitsaanerpaa-nissaa anguniarlugu nakorsat nalilerniagassaraat naappaatip killiffia su-miinnersoq.

Iggissakkut kræfteqarnermi tinunerup annertussusia nappaatillu siarua-simanera tunngavigalugu nappaatip killiffia immikkoortunut sisamanut killiffilersorneqartarpooq.

Killiffik 1:

Tinumasoq kræfteqarfik iggissap amerasaannaaniippoq.

Killiffik 2:

Tinumasoq kræfteqarfik iggissap nukiinut anngussimavoq kiisalu iggissa-miittunut qinersinut ingerlasimalluni.

Killiffik 3:

Tinusoorneq iggissap avataanut anngussimavoq erlaviillu iggissamut qanit-tut angusimallugit, imaluunniit iggiaq akimorlugu ingerlaarsimavoq taama-tuttaarlu avatangiisiminiittut qinersit ilangullugit annguffigisimallugit.

Killiffik 4:

Kräfti qinersinut timip sinneraniittunut ingerlaarsimavoq erlaviillu ilaannut, soorlu tingunnut anngussimalluni.

Iggissakkut kræftip taamatut killiffilersorneqarnera, kræftimik nappaatit pillugit aalajangersimasumik killiffilersueriaaseq, TNM-imik taasaq malillugu aalajangersagaavoq. Naqinnerit atukkat oqaatsinut kræftip oqaasertaanut assigiinngitsunut tunngapput. Soorlu T, (Tumor) atorneqarpoq tinusumut, tinusullu qanoq atsigilersimaneranut tunngatillugu atorneqartarpooq.

N qinersinut, (nodes) tunngatinneqarluni atorneqartarpooq kiisalu M, (Metas-taser) atorneqarpoq siaruaattoorsimernut tunngatillugu.



TNM-i atorlugu killifilersuinermi naalisaatit isumai

T1: Tinunerup allamut ingerlanani ameraasamiiginnarnera.

T2: Tinunerup ameraasap tullianut nukinnut ingerlasimanera.

T3: Tinunerup iggiaq akimorsimavaa.

T4: Tinuneq erlaviit sinnerinut siaruaassimavoq.

N0: Qinersinut siaruaattoqarsimangilaq.

N1: Qinersinut siaruaattoqarsimavoq.


M0: Qinersinut timip sinneraniittunut erlavinnullu siaruaattoqarsimangilaq.

M1: Qinersinut timimiittunut erlavinnullu siaruaattoqarsimavoq.

Iggiaq akimut isigalugu.


Killiffik 1

Tinuneq allamut
ingerlanani
amerasamiiginnarpoq.




Killiffik 2

Tinuneq amerasap
tullianut nukinnut
ingerlasimavoq.




Killiffik 3

Tinunerup iggiaq
akimorsimavaa.



Killiffik 4

Nappaat timip sinneran-
nut ingerlaarsimaguni
amerlanertigut qinersi-
nut, tingummut puan-
nulluunniit siaruaattar-
poq. Titarnerup aap-
paluttup takutippaa
iggiaq. Titarnerit qerner-
tut marluk takutippaat
puuaap aappaat tingullu.



Katsorsaariaatsit suut atorneqarpat?

Katsorsaanerup sorliup atorneqarnissaanut aalajangiisuusarput, kræftip sumiinnersi, siaruaassimanera kiisalu inuup qanoq peqqitsiginera. Pilatsinnej arjornanngippat ilinnut atortinneqassaaq.

Pilatsissinnaanngikkuilli, imaappallu nappaatit iggissamiit siaruaassimanngitsoq kiisalu iggissap qinersiiniippat, taava qinngortartinneq kemoterapeertinnerlu katsorsaasiunneqassapput.

Ilisimatuussutsikkut misileraanerit takutippaat, qanikkut naakkullu kræfteqartunut (Cardia cancer) qinngortartinneq kemoterapiilu ataatsikkut nakorsaatigalugit peqqissaaneq iluatsittumik kinguneqartartooq. Tamanna aamma pilatsereernerup kingorna imaluunniit pilatsissinnaanngikkaanni katsorsaatitut atortinneqartarpooq.

Pilatsinnej

Iggissamikkut kræfteqartut amerlasuut kræftip immikkoortiterneqarnerata aallaqqaataaniit pingajuannut killiffeqarsimasut pilatsittarput kræfti peer-niarlugu. Pilatsinnej sinitssineqarnermi pisarpoq. Pilatsinnermi iggissap ilaa kræfteqarfik, qinersillu peerneqartarput kiisalu aamma aqajaqqup qulaaniittooq iggissap naanera amerlanerpaatigut peerneqarsinnaasarpoq.

Taamaalioreiraanni iggiaq aqajaqqumut katitinneqartarpooq, imaappalli iggiaq naappallaalersoq, taava ilaatigut pisariaqartarpooq inalukkamiit ilangnarsilluni iggiaq aqajarorlu imminnut katitinnissaat.

Napparsimasut ilaat qinngortartinnissamik immaqalu kemoterapi-mik nakorsaasernissaannik neqeroorfigineqartarput, tamanna pisarpoq pilatsinnekut kræfteqarfik tamakkerlugu peerneqarsimannngikkaangat.

Ilaatigut pisariaqartarpooq pilanneqartinnani qinngortartittarnissaq, tamanna katsorsaatitut neqeroorutigineqartarpooq kræfteqarfiup annikillisin-niarneqqaarnissaa siunertalarlugu.

Pilattaasoqartillugu iggissap ammut killeqarfianiit aqajaqqup qulaa ilangullugu peerneqartarput, taamaalioreernermermi iggiaq aqajarorlu imminnut katitinneqartarpooq.

Pilatsinnejq ajornaraangat nakorsaasiisoqartarpoq

Arlalinnik pissuteqarluni pilatsinnejq ilaatigut ajornartarpoq. Soorlu kræfteqarfik iggisap qulaatungaaniippat pilatsilluni peerniarnissaa ajornakusoor-tarpoq imaluunniit ajornavittarpoq. Napparsimasut iggissamikkut iggis-sallu avataaniilereersimasumik kræfteqalersimasut nappaatip killiffiata pingajuannut inissisimasut pilanneqarneq ajorput. Nappaat timip sinneranut siaruaassimappat (metastaser) aamma pilaasoqarneq ajorpoq.

Pilaasoqarsinnaanera pillugu naliliiniarnermi apeqqutaasut allat, soorlu utoq-qaussutsit, timip pisinnaassusia allatigullu nappaateqarnerit isiginiarneqtar-tarput aalajangiiniarnermilu apeqqutaaqataasarlutik.

Pilaasoqarsinnaanngippat neqeroorfigineqassaatit qinngortartinnissamik imaluunniit kemoterapeerneqarnissamik, imaluunniit nakorsaatit taakkua marluutillugit katsorsaasiunneqassapput.

Qinngortaaneq

Qinngortaaneq tassaavoq radiop qinngorneri iluaqutigalugit kræftimik nungusaaneq. Amerlanerit CT-scannerneqaqqaartarput, taamaalilluni kat-sorsartinnissaq nakorsaniit sukumiisumik pilersaarusrusiorluarneqarsinnaas-sammatt. Qinngortagassap qanoq atsigineranut apeqqutaasarpooq tinunerup qanoq angitiginera, kiisalu qinersit aamma ilanngullutik katsorsarneqartari-aqalersimanersut. Qinngortaaneq sammivinniit arlalinniit, soorlu saatu-ngaaniit, tunuaniit imaluunniit sanianiit pisarpoq. Qinngortaaneq pillugu radiop qinngornerinik eqqugaasoqarneq ajorpoq.

Nalinginnaanaerpaavoq 25-it 33-illu akornanni qinngortartittarnissaq.


Soorlu sapaatit akunnerannut ataatsimut tallimariarluni, sapaatillu akunnerini 5-6-ini pisarpoq. Qinngortartinneq annernanngilaq pinerillu tamaasa minutsialunnguanik sivissuseqartarluni. Qinngortartinnerup nalaani nap-parsimmavimmi uninnganissaq pisariaqanngilaq. Igissakkut kræfteqartuni qinngortaaneq kisimiitillugu katsorsaaneq qaqtigorsuaq pisarpoq.

Amerlanerpaat kemoterapiimik ilassusiilluni peqqissarneqartarput.

Kemoterapeerneqarneq

Kemoterapii tassaavoq nakorsaat inuup sananeqataanut toqunartortalik, aakkut timimut siaruaatsinnejqartarpoq imaluunnit kemo iisartagaq atortin-neqartarpoq. Taqqakkut kapitilluni slangeerannguamik atortulerluni timi-mut akulerutsinnejqartarpoq. Nakorsaat taanna assigiinngisitaarpoq, amer-lanertigut kemo-t ilaat cisplatin aamma 5 FU nakorsaatigitinneqartarpoq, kemoterapeerneqartarnerup nalaani napparsimmavimmi tamatigut unin-ngasarnissaq pisariaqarneq ajorpoq.

Pilatsinnerup
siorna.



Pilatsinnerup
kingorna.



Kemoterapii pitsaanerpaamik sunniuteqartinniarlugu nakorsaatip taassuma ilai assigiinnisitaartut atortinnejqarajupput. Kemoterapiip kræftip tinusor taa piffissami aalajagersimasumi annikillisittarpaa tinusoornelerli piivissinnaanagu. Kemoterapii qinngortarneqarnermik ilalerlugu pitsaanerpaamik sunniuteqartinneqartarpooq. Napparsimasut iggissamikkut kræfteqartut kræfteqarfiat qaffasissumi inisisimagaangat amerlanertigut qinngortaanermik kemoterapiimillu nakorsaaserneqartarpuit.

Qinngortarneqarnermik kemoterapiimillu ataatsikkut nakorsaateqartitaaneq

Kemoterapii qinngortarneqartarnerlu, ataatsikoortillugit peqqissaatigine-qarajupput, taamaaliornikkut pitsaanerpaaq anguniarneqartarmat.

Taamaattoq napparsimasut tamarmik taamatut katsorsarneqarsinnaaneq ajorput, katsorsaatit kingunipilui napparsimasut ilaasa sapertarmatigit.

Qinngortaaneq sapaatit akunnerannut tallimariarlugu atortinneqartarpooq tamannalu sapaatit akunnerini 5-7-inik sivisussusilimmi pisarluni, kemoterapiili sapaatit akunneri pingasut imaluunni sisamat qaangiukkaangata ataasiarluni tunniunneqartarpooq. Qinngortaaneq napparsimmavimmut uninngikkaluarluni atortinneqartarpooq taamaattorli kemoterapiit assigiingitsut ilaat atortikkaanni tamanna napparsimmavimmi uninngassuti-gineqartariaqarpoq. Ilaatigut kemoterapii sapaatit akunnerini arlalinni tulleriisillugu atortinneqartarpooq tamannalu pisinnaalluni qinngortartinnissaq sioqqullugu. Tamanna qaangiuttereerpat takuneqarsinnaappallu kræfteqarfik annikillisimasoq, taava pilatsinnej ilaatigut pisinnaasarpoq.

Iggiaasalersinnej

Nerisat tupissutaajunnaarsinniarlugit ilaatigut pisariaqartarpooq iggissamut ruujorinnguatut ittumik ikkussinissaq. Tamanna atuagassiap ilaani annertunerusumik eqqartorneqassaaq.

Siunnersuutsialaat:

Pilatsissimatilluni pujortartartuuunngikaanni tamanna pilatsissimasumut kingunipiloqannginnerusarpoq, taamaattumik pujortartartuugaanni pilatsin-nissaq sioqqullugu pujortarunnaarnissaq pitsaanerpaaassaq. Kingunipiluit tassaasinnaapput aseruuttoornerit, uummatikkut aamma puakkut ippinnior-nerit, pilatsifikkut ammartooqqinnerit maminnavernerlu. Kiisalu qinngortartinnerup iluaqtaasinnaassusia pujortartartuni annikinnerusarpoq.

Imigassaaq aalakoornartoq Peqqinnissamut Qullersaqarfimmiit killigititaasu-niit sinnerlugu imertarukku aamma tamanna pilatsissimatillutit kingunipilo-qartissinnaavat. Kingunipiloqartinnissat annikillisarsinnaavat aalakoornar-tutornerit annikilligukku.

Tamanna atuagassiap ilaani annertunerusumik eqqartorneqassaaq.

Katsorsartinnerup kingunerisinnaasai suuppat?

Sunaluunniit nakorsaataasoq atoraanni tamanna peqqissarnerup nalaani kiisalu siunissami kiungunipiloqarsinnaavoq, kiisalu nakorsaatit assigiinngitsut inuit assigiinngitsutigut kinguneqartittarpaat.

Ataani atuarsinnaavatit pilanneqarnermi, qinngortartinnermi, kemoterapi-milu kingunipiluutaasinaasut assigiinngitsut nalinginnaanerpaat.

Qujanartumilli peqqissartut tamavimmik kingunipiluit eqqartorneqartut tamaasa atorneq ajorpaat. Sulisut qinnuigisinnaavatit ilinnorpiaq peqqissaataasut sunik kingunipiloqarsinnaaneri sukumiisumik nassuaatigeqquullugu.

Pilatsinnerup nassatarisinnaasai

Pillattaanermi teknikkikut periarfissat siuariaataasut ullutsinni atuuttut pitsaasumik misilittagaqarfipput, tamanna aamma pissutaalluni pilatseernermi kingunipilutsitsisinnaaneq ilimanaateqarpallaarunnaarnikuovoq. Kingunipiluit nalinginnaanerpaat tassaapput puakkut nuffersoorneq, ikit ammartorneri, aseruuttoorneq kiisalu taqqakkut milittoorsinnaaneq. Qaqutigorsuaq sunngakkut ajoqusertoortoqarsinnaavoq, taamaattoqartillugu sungaq peerneqartariaqartarpooq.

Kingunipiluit pinngitsoortinniarlugin aamma siniffimiitilluni timiaalatin-neqartariaqarpoq, kingunipiluummi pinngornerusarmata siniffimmi sivisuumik aalassassanan nalaannarnermi. Taamaammat pilatsereernerup kingorna sapinngisamik piaartumik siniffimmiit makilluni aalarneq pingaaru-teqarluinnarpoq. Qanigisat imaluunniit napparsimmavimmi sulisut pisuttuatqatiginnaaneraatsit immaqa aperisinnaavaatit.

Inuit timimikkut sanngiillismasut tassaanerupput kingunipiloqartitsinerusartut.

Pilattartinnerup kingunipilui

Pilattartereernerup kingorna qaammatini arlaliusinnaasuni amerlasuut nerisassaminnik illigisaqarneq ajorput taamaattumillu oqiliartuinnartarlutik. Ilaat aqajaqqup isseranik qasilitsumik piiagaqartarlersarput (ukutserlun-nerujussuaq). Kræfteqarfik appasisummiissimappat, tassa iggissap aqajaqqullu atanerat naalisimappat tamanna nalinginnaanerusarpoq. Iggissap naanera aqajaqqullu qulaatungaa peerneqarsimappat pilanneqarsimasut 20 pct.-ii iisiniarnermikkut ajornartorsiortarput. Tamanna pissuteqarpoq iggissap amilisimaneranik eqissimaneranillu. lisiuminaatsitsisarnerli pilaaneqatorlugu aaqqiigivineqartarpooq arlalinnik iliuseqarluni asiillarsaasoqarsinnaammatt.

Qinngortartinnerup kingunipilui

Qinngortarneqarluni katsorsartinneq inuit assigiinnngitsunik qisuarialtigisarpaat, ilaat ippigusuuteqarpiaiatik inuunertik ingerlatiinnartarpaat. Kingunipiluit nalinginnaanerpaat tassaapput ammip uussinnaanera iisiniarnerullu ajornakusuulernera. Kingunipiluit ajornersaraat iggissakkut ameraasaatigullu ippigusulerneq soorlu kiattuliorneq/ukutsilunneq, kiisalu sakissap iluatigut qasilisoorneq uunartuliornertullu malussarniarneq aamma iisiniarnermi tupittuusineq sakkortusiartorsinnaavoq. Tamakkua malusnarerit qinngortartereernerup kingorna qaangiuttarput.

Qinngortartinnerup kingunipilui ataavartuusinnaasut

Qinngortartinnerup kingunipilugisinnaasai piffissaq sivisunerusoq eqqarsaatigalugu tassaapput ikit mamereernerisa kingorna iggissap amilinera. Tamanna aaqqiiviginiarneqartarpoq iggiaq asiillarsarniarlugu pilatsinnikkut. Qinngortartinnerup kingorna aamma puaat qinngortaammit eqqorneqarsimasut querattarsinnaapput, taamatuttaaq uummat eqqorneqarsinnaalluni, puannulli uummammullu kingunipiloqartitsisinnaaneq anniktsuararsuuvoq qinngortaanermi arlalitsigut pitsangngorsaajuarnerit iluaqtigalugit kræfteqarfik kisiat eqqorniarneqartarmat.

Kemoterapiip kingunipilui

Kemoterapiimi timi tamarmi sunnerneqartarpoq, taamaattumik inuup sana-neqaatai kræfteqarfiusut kisimik sunnerneqarneq ajorput aammali sanane-qaatit peqqissut sunnerneqartarlutik. Tamanna arlalitsigut kingunipiloqartarpoq amerlanertigulli kingunipiluit tamakkua qaangiuttarput.

Kemoterapiip kingunipilui nalinginnaanerpaat tassaapput merianngunerit, meriarnerit timminnerit, qanikkut aseruuttoornerit, paterniittullu aap akui issorsaatit sunnerneqarneri, aap akuisa aappalaartut qaqortullu sunnerneqarneri, tartut akornuserneri, tusillanneq kiisalu assaat isikkallu nuuisa kakillaaluttartunngorneri.

Kemoterapiip kingunipilui ataavartut


Assaat isikkallu nuuisa kakillaaluttarnerat kapinartutullu misinnartumik ma-lussarfiusalernerat sivisuumik atorneqarsinnaavoq ilaatigulli qaangerneqar-sinnaajunnaarsimasarluni. Kemo-t assigiinngitsut ilaat, pingaartumik cisplatin tartut ajoquteqalernerannik kinguneqarsinnaavoq. Tamanna malunnaa-tilimmik ersiuteqanngilaq aaversittarnikkulli eqqumaffigineqarsinnaalluni. Cisplatin aamma qaqutigorsuaq tusillassutaasinnaavoq kiisalu avilortutut ittumik tusaasuusisoqartoqalersinnaavoq.

Qinngortaanerup kemoterapiillu ataatsikkoortillugit nakorsaatiginerini kingunipiluuusinnaasut suuneri

Nakorsaatit ataatsikkut atortinnerini kingunipiluuusinnaasut imaannaan-ngitsuuusinnaapput. Kemoterapiimiit qinngortarneqarnermillu kingunipiluit ataatsikkut atorneqarsinnaapput, taamaattorli qinngortartinnerup kingu-nipilui kemoterapiimiit sakkortusarneqarsinnaapput.

Katsorsartinnerpit nalaani sulisut oqaloqatigikkit

Qinngortartinnermik imaluunniit kemoterapiimik katsorsartissaguit, qanoq ilillutit kingunipilunnik iluaalliornartuinillu annikillisaaniarsinnaanerit pillugu siunnersoqqullutit ilitsorsorneqaqqullutillu katsorsaanermi sullisisunut saaf-figinnissinnaavutit.



Allatut katsorsaariaatsinik peqarpa?

Misiliutaalluni nakorsaatissinneqarneq

Misiliutaalluni nakorsaateqarneq tassaavoq nakorsaatinik nutaanik misiliulluni ilisimatusaatigalugu misilittaaneq. Nakorsaatit misiliutaasut suli uppernarsaatitaqanngillat ilumut iluaqutaanersut. Tamanna pisarpoq nakorsaatip pisortaniit akuerineqarnissaat sioqqullugu, misiliutaasullu inuit immikkut akuersimasut aalajangersimasumik amerlassuseqartarpuit.

Misiliutaalluni nakorsaaserneqarnissamut kikkut peqataanissaat pillugu immikkut aalajangersagaqanngilaq. Misiliutaanermi apeqqutaatinneqartarpooq krætip suunera, kræfteqarluni paasinnerlaajuneq, imaluunniit katsorneqarluarnerup kingorna napparsimaleqqissimasuuneq. Aamma apeqqutaasarpooq tinunerup qanoq angitiginera imaluunniit siaruaassimanera. Kiisalu siusinnerusukkut katsorsartissimaneq apeqqutaaqataasarpooq.

Misiliutaasut tamarmik aalajangersimasumik pilersaarusiorgagineqartarpuit, soorlu qanoq sivisutigisumik misiliutaanissaq ilaallu ilanngullugit.

Misileraataasumik katsorsaaneq

Misileraatasumik katsorsaaneq tassaavoq siusinnerusukkut atorsimanagu kiisalu suli paasilluarneqanngitsoq ilumut katsorsataasinnaanersoq, tassa kinguneqarluarsinnaaneranik uppernarsivinneqanngitsumik misileraalluni katsorsaaneq. Aalajangersimasumik maleruagassiisarneq qaqtigorsuaq pisarpoq, kiisalu misileraataasumik katsorsasoqartarpooq allatigut soriusissaarunnermi.

Siunertaavoq toqqutaasinnaasumik nappaatillit ataasiakkaat nappaateqarnerini pitsaanerpaamik iliuuseqarfinginiarneqarnissaat.

Misileraataasumik katsorsaanerit pisarput, kræfteqartunut katsorsavinni immikkorluinnaq pitsaussilimmik qaffasissumillu ilisimatusarfiusuni. Kræftimik napparsimasut misileraataasumik katsorsagassatut saaffiginnissutaasarpuit innersuunneqartarlutilu Peqqinnissamut Qullersaqarfimmut.

Misileraataasumik katsorsaaneq pillugu immikkut ilisimasallit suleqatigiissitat Peqqinnissamut Qullersaqarfimmut innersuussisarpuit siunnersuisarlutilu.

Periaatsit ilisimatusarnikkut akuerisaanngitsut atorlugit katsorsaaneq

Tamanna katsorsaariaaseq tassaavoq napparsimmavinni nakorsaniit nalinginnaasumik neqeroorutaaneq ajortoq. Katsorsaatissatut immikkut akuerisaasut nakorsamiit itigartitsissutigineqarsinnaanngillat. Taamaattoq illit soorunami toqqarsinnaavat, katsorsartinnissat nakorsamiit neqeroorutaasoq ilassuteqarfugalugu periaatsit ilisimatusarnikkut akuerisaanngitsut atorlugit katsorsartinnissat. Taamaallaat eqqumaffigiinnassavat immikkut akuerisaanngitsut tassaammata ilisimatuussutsikkut misileraanertaqanngitsut, taa-

maattumillu sunniutaat imaluunniit kingunipiloqarnersut erseqqissumik uppernarsaatitaqanngitsoq.

Immikkut akuerineqannngitsut nakorsaatiginiartakkat napparsimmavinni katsorsaatinut nakorsaatigitinneqartunut sunniisinnaasunik aamma ilaqsinaapput. Taamaattumik katsorsartinnerit tamakkuninnga ilalissagukku tamanna pillugu nakorsaq oqaloqatigissallugu pingaaruteqarpoq.

Katsorsartinneq qaangiuppat qanoq pisoqassava?

Katsorsartinnerit qaangiuppat nukissaqanngitsutut qasoqqasutullu misiguit tamanna nalinginnaalluinnarpooq. Timeq atorlugu iliuuseqarnissaq ilaasa nukkakkiartutigisarpaat kiisalu nappaateqarneq pillugu eqqarsaateqaaq-qajaasut pisariaqartilluinnakkaminnik timersuuteqalerneq allamut saasaa-tigisarpaat. Katsorsartissimasut ilaat amerlasuut kingunipilutsisarpus ataavarsinnaasunik tamannalu sungiunniartariaqartarpooq. Amerlasuut ilua-tigisarpaat kræfteqarsimasunut siunnersuisarfeqarpat taakkua atorlu-arnissaat.

Misissortinneq

Katsorsartinnerit qaangiuppat misissortinnissat pillugu piffissami aalajangersimasumi napparsimmavimminngaanniit aggersarneqartassaatit.

Siunertaavoq nappaat nangeqqissimanersoq misissussallugu imaluunniit katsorsartinnerup kingunerisaanik ippinnartoqalersimanera pillugu misis-sortinnissaq.

Iisiuminaatsitsineq, nererusussuseqannginnej kiisalu nassuiaatissartaqan-ngitsumik sanigorneq pisariaqavippu eqquumaffigissallugit.

Nassuiaruminaatsunik malussaruit uninngavigisimasannut saaffiginninnis-sat pisariaqavippoq.

Nappaatip nangeqqinnissaanut ersissuteqarneq

Katsorsartinnerpit kingorna ilisimasariaqarpat, illit ilinnullu attuumassute-qartut, siornatigutut inuunerisimasamut, soorlumi pisoqarsimannngitsutut pillusi uteqqinniarnissaq ajornakusuussaqisoq. Nappaateqarsimasut amer-laqisut nappaatip nangeqqinnissaanut annilaangatuunngortarput timimilu pisut assut eqquumaffigilersarlugit.

Aamma illit taamatorluinnaq misiguit, ilinnut iluaquataasinnaavoq ernum-matitit pillugit nakorsat oqaloqatigigukku. Allat ilittut nappaateqarsimasut aamma misigisaat pillugit oqaloqateqartarsinnaassaatit, soorlu sumiifinni ikorfartoqatigiinnik aallartitsisoqarsimappat.

Pujortartuu simaguit tupatorunnaarnikkut nangeqqissinnaanerit pinngitsoortinnerusinnavat, taamatuttaaq imigassaq aalakoornartoq killilersimaaraanni, Peqqinnissamut Qullersaqarfiuq killigititai qaangerneq ajoraanni nangeqqinnissaq akiorneqarsinnaavoq. Tamanna pillugu siunnersorneqarnissat ilitser- suunneqarnissallu pisariaqartikkukku nakorsat oqaloqatigisinnavat.

Ajorunnaassaanga?

Kræftimik nappaateqalersimagaanni tamanna amerlasuunit tuparujussuas-sutaasarpooq. Amerlasuuni eqqarsaat siuleq tassaasarpooq: Toqussaanga?

Iggissakkut aqajaqqullu qulaatigut kræfteqarneq navianartuuvoq peqqisseq-qissinnaanermullu apeqqutaasoq annerpaaq tassaavoq siaruattooreer-simannginneq kiisalu kræfteqarfip tamakkerluni peerneqarsinnaanera.

Napparsimanerup killiffia peqqissisoqarsinnaaneranut tikkuussisinnaavoq.

Taamaattoq kemoterapii qinngortartinnerlu ataatsikkoortillugit katsorsaa-taappata tamanna ullumikkut peqqississutaasalerikuuvooq. Tamanna aamma pisarpoq pilattaaneq ajornarsereersimagaluartillugu.

Naatsorsueqqissaarnerit qanoq takussutissiippat?

Kræfteqalersimasut kræftimillu toqquteqartut pillugit kisitsisit naatsorsuine- rillu pigineqarput. Taamaattoq pingaaruteqarluinnarpooq illiteqqaamassagakku naatsorsuinerit iliinnorpiaq inisisimaninnullu tunngassuteqangimmata.

Naatsorsuinerit takutinniartarpaat inuit aalajangersimasumik nappaatillit amerlasuut agguataarneqarnermikkut qanoq inisisimanersut taamaattumillu inuit ataasiakkaat pillugit oqaluttuassartaqaratik.


Illit peqqissivissinnaaninnut apeqqutaasut tassaapput, nappaativit killiffia, ukiutit, arnaanerit angutaanerilluunniit, allanik nappaateqareernerit, inooriaat- sit timikkullu nukittuujunerit. Peqqissivissinnaanerit nakorsamut apeqqutigisinnavat, taamaattoq ilimagisinnaanngilat nakorsap eqqoqqissaartumik akissutissaqartitsinissa.


Iggissakkut kræfteqartut pillugit naatsorsueqqissaarnerit kræftimut akiui- niarluni suliniaqatigiiffissuup Danmarkimiittup, Kræftens Bekæmpelse-p inter- netikkut nittartagaani alakkaneqarsinnaapput. (www.cancer.dk) Taamaattoq aamma Kalaallit Nunaanni Peqqinnissamut Qullersaqarfik kisitsisink saqqum- mersitaqartapoq taakkulu peqqinnissaqarfimmi sullissisunut apeqqutigine- qarsinnaapput.

Iggiaq qanoq atuuffeqarpa?

Iggiaq amitsukujuujuvoq 25 cm.-it missaanik takissusilik, iluatungaa sanimut 2 cm-nik silissuseqarpoq. Qungatsip naaneraniit aallartippoq ammut sakissat naat qulaat nassallu aqqusaarlugit aqajaqqup killeqarfata tungaanut killifflik. Nerisat imikkallu iggissakkut aqajaqqumut ingerlaatinneqartarput. Iggissamiipput nukiit qaleriaat, ilorliulluni iggissap amerasaa. Tassanerpiaq kræfti amerlanertigut aallartittarpoq. Latinerisut iggiaq taaneqartarpoq esophacos. Aqajaqqup qulaatunginnguani iggissap ataatungaani kræfteqarfik latinerisut taaneqartarpoq cardia cancer-imik.

Danmarkimi naatsorsueqqissaartarfiup kisitsaatai naapertortorlugit anguitit 250-it Danmarkimi ukiumut iggissamikkut kræfteqalersarput, arnalli 100-ut Danmarkimi iggissamikkut kræfteqalersarlutik.





Kræfti peerneqarsinnaanngippat taava?

Iggissakkut kræfti imaluunniit aqajaqqup qulaatigut kræfti (cardia cancer) tamatigorluinnaq peerneqarsinnaaneq ajorpoq. Peerneqarsinnaatinngagu nakorsanit neqeroorutigineqartarpoq nipaallisaasersuinikkut oqilisaaneq, tamanna aamma nappaatip nangeqqissimanerani neqeroorutigineqartarpoq.

Napparsimasut ilaat kræftimikkut siaruattoorsimasut oqilisaaviginiarlugit kemoterapi taakkununnga aamma atortinneqartarpoq. Allataamma taamatut siaruattoorsimasut imaluunnit nangeqqissimasut qinggortarneqarnissamik imaluunniit anniarnaveersaatnik neqeroorfingineqartarput. Taamaaliorneq nappasimasup peqqissivinnissaanik kinguneqartinneqarneq ajorpoq, taa-maattorli ippinnaatit annerisallu annikillisinneqarsinnaapput, kiisalu nap-paataat malunnarunnaavissinnaavoq immaqalu piffissap ilaannaani malun-narsisinnaalluni taamaalillunilu inuuneq sivilsunerusinnaalluni.

lisiuminaatsitsinerup qanoq iliuuseqarfingisinnaanera

Napparsimasut amerlasuut iisiniarnermikkut ajornartorsiuteqartarput, tamanna assigiinngitsutigut iliuuseqarfingineqartarpoq. Iggissap kræfteqarfia ilaatigut pilattaanikkut ikkussivigineqartarpoq asiillaataasinnaasumik.

Taanna igalaaminermik sanaajuvvoq stent-imik qallunaatut taaguiteqarluni. Taanna iluaqtigalugu ajornannginnerusumik nerisoqarsinnaallunilu imer-



toqarsinnaalersapoq. Nappaat oqinnerusumik atugareqqullugu, qinngortaasoqassatillugu qinngortaanerit 5-10-nik amerlassusilit ator-tinneqarajuttarput. Napparsimasut affaata missaasa tamanna iisiniarner-minni anniarnaveersatigiitigalugulu iluaqtigisinnaasarpaat, qaamma-tinilu arlalinni iluaqutaasapoq.

Nangeqqinnermi katsorsarneqarneq

Nappaat ajoraluartumik amerlasuuni nangeqqittarpoq. Nanginnej tas-saasinnaavoq kræfteqarfingisamasami taamaallaat nangittoqarneq ima-luunniit qinersit ilanngullutik kræfteqarfingussinnaasarpus taama-tuttaaq qinersit timip sinneraniittut annguffigineqarsinnaasarpus, soorlu puannut, tingunnut saanernullu kræfti ingerlasimasinnaavoq.

Nangittoorneq qanoq nakorsaasissalugu aalajangernissamut apeq-qutaasapoq katsorsaaneq siulleq qanoq ittoq atorneqarsimanersoq, kiisalu nappaatip nangeqqinnersa qanoq ittuunersoq. Nangeqqinnermi katsorsartinneq siullermitut ittuusinnaavoq, soorlu pilaasoqarsinnaavoq aamma kemoterapi qinngortaanerlu atorlugit nangeqqinnej katsor-sarneqarsinnaavoq. Taamatut katsorsaaneq peqqissivinnermik kingu-neqarsinnaavoq tamannali qaqtigorsuaq pisarpoq.

Sooq iggissakkut kræfteqalersoqartarpa?

Iggissakkut kræfteqalersarnermut pissutaasut eqqoqqissaartut ilisimatuuniit ersarissumik suli paasineqanngillat, taamaattoq pissutaasinnaasut aalajangersimasut arlaliupput. Paasisat ilagaat kræfteqalersimasuni angutit arnaniit amerlanerusut. Kiisalu tupa imigassarlu aalakoornartoq ingasattumik atoraanni iggissakkut kræfteqalernissaq qaninnerusartoq.

Aqajaqqup isseranik sungarnitsumik iggissamiittoqarpallaalerpat, (kiattulior-pallaaraanni/ukutsilukkaanni) tamanna immikkut taaguuteqarpoq "Barrett's esofacus"-mik. Tamanna iggissap appasissortaanut allannguutaasinnaavoq taamalu kræfteqalernissamut qanillaataasinnaalluni.

Nammineq qanoq iliuuseqarsinnaavunga?

Kräftimik nappaateqartut amerlasuut soqutigillualersarpaat namminneq qanoq iliuuseqarsinnaanertik. Nerisat, timersorneq, tupa, imigassarlu aala-koornartoq pillugit nammineq iliuuseqartoqarsinnaavoq.

Nerisat timersornerlu

Kräftimik nappaatillit amerlasuut sanigortarput. Ilaatigut piffissap inger-lanerani neriumajunnaarneq, meriannguneq, iisumaatsitsineq allatigullu nerisat aqquaatigut erlavikkut ajornartorsiuteqarneq atugaagajuppoq. Inunnut nappaateqanngitsunut naleqqiullugu nerisat tangeqarnerusut, soorlu orsortaqarnerusut proteineqarnerusullu nerinerusariaqarput. Taman-na pillugu nakorsaq imaluunniit peqqissaasoq saaffigiuk siunnersoqqullut. Katsorsarneqarnerup nalaani kingornalu amerlasuut iluaqtigisaqaat ti-mersorneq, taamaliornermikkut timikkut tarnikkullu iluarusunnerusaramik. Qanoq iliuuseqarsinnaanerit susinnaatitaanerillu pillugu nakorsaq tamatuminnga oqaloqatigiuq.

Pujortartarpit?

Pujortartaruit, iggissakkullu kræfteqartuullutit, taava pujortarunnaarnissat pitsaanerpaaajussaaq. Pujortartuunerpit katsorsartinnerit sunniuteqarfisis-savaa, soorlu qinngortartinnejarninni pilatsinninnilu pujortartuunerit akornutissarsissutigisinnaaneruat. Kiisalu pilatsinnerup kingorna ikit mamikku-maataarnerussaaq.

Pilatsissimaguit tupatortuunnginnerit iluaqutigalugu ikit mamsapallassinnanaruvoq. Peqqinnissamut aqutsisoqarfimmiit innersuussutigineqarpoq pilatsinnissaq sioqullugu sapaatit akunnerini 6-8-ni tupatorunnaareersimanissaq. Taamatuttaaq pilatsereernerup kingorna sapaatit akunnerini 8-12-ini tupator-taleeqinnginnissaq innersuussutaalluni. Tupatortakkat ikilisillugit iluaqutaangilaq. Tupa asoorutivittariaqarpoq.
Kiisalu qinngortartinneq iluaqutaanerussaaq tupatortannngikkuit.

Tassa imaappoq: Pujortarnerit pissutigalugu napparsimmavimmi uninnganerit sivisunerussaaq peqqissutsinnut akornutaasut amerlaneruneri pissutigalugit.

Pujortarunnaarnissamut ikiorneqarusuppit?

Pujortarunnaarniarneq assut ajornakusoorsinnaavoq. Pingaartumik napparsimanerup nalaani ajornakusoorsinnaavoq. Peqqinnissaqarfitt amerlasuut kommunillu allaffii pujortarunnaarnissaq pillugu siunnersuisinnaapput. Taamaattumik nakorsat peqqissaasullu, kiisalu kommunit allaffii sumifimmiittut saaffigineqarsinnaapput aperaluni pujortarunnaarusuttunut qanoq periarfissaqarnersoq. Tamatuma saniatigut Paarisa piffissap ilaani pujortarunnaarnissamik ilitsersuisarpooq. Tamanna pillugu aamma peqqinnissaqarfimmi sulisut aperineqarsinnaapput. Taamaattoq aamma qallunaatut paasisartunut internet-ikkut saaffiginnittoqarsinnaavoq uunga: Kræftens Bekæmpelse i Danmark. Nittartagaq una alakkarterlugu: www.cancer.dk/tobak

Aalakoornartutorpallaarpit?

Inuit imigassamik aalakoornartumik killigititaasuniit sinniillutik atuisut pilattartittussaasullu pilattartereernerminni eqqugaanerusarput, soorlu ikikkut aseruuttoorernerk, uummatikkut puakkullu peqqiiliormerk kiiisalu ikikkut aanaartitsinernik ikillu mamikkumaataarnerannik. Aalakoornartutor-tut aalakoornartutorneq ajortunut sanilliullutik napparsimmavinni uninnganerat sivisunerusarpoq. Katsorsarneqareernerup kingorna innersuussutaa-sarpoq aalakoornartutussagaanni tamanna killilersimaarniartariaqartoq, soorlu killigititaasut qaangernagit aalakoornartutortoqartassasoq.

Aalakoornartutorerup allanngortinnissaanut ikiorneqarusuppit?

Nappaatit pillugu suliarinnissat sioqqullugu aalakoornartutorerit annikillisarniarlugu nakorsat imaluunniit napparsimmavimmi sulisut siunnersortigisinnaavatit. Kiisalu sumiiffinni pitsaaliuinermik siunnersorteqarfiusuni sullisisut aalakoornartumillu ajornartorsiuteqartut pillugit siunersuisinnaasut saaffigisinnaavatit.

Peqqinnissamut Qullersaqarfiup aalakoornartutorermut killigititai

- Arnanut sapaatit akunnerannut ataatsimut immiaaqqat nalinginnaasut imaluunniit kimittoqatai amerlanerpaamik 14-it.
- Angutinut sapaatit akunnerannut ataatsimut immiaaqqat nalinginnaasut imaluunniit kimittoqatai amerlanerpaamik 21-it.

Sumi ikiorneqarsinnaavunga imaluunniit

siunnersorqeinqarsinnaavunga?

Kræftimut akiuiniarluni suliniaqatigiiffik, Neriuffik Kalaallit Nunaanni sumiiffinni amerlasuuni immikkoortortaqaqrarfeqarpoq. Ilinnut qaninnerpaaq sumiinnersoq qanorlu saaffigineqarsinnaanersoq pillugu napparsimmavimmi sulisunut nakorsamullu paasiniarsinnaavat. Imaluunniit Neriuffiup Kattuffia Nuummiittoq saaffigisinnaavat uunga:

Neriuffik, Postboks 1546, Aqqusinersuaq 48, 3900 Nuuk

Tlf. +299 49 04 89 Fax: +299 31 25 04

E-mail: neriuffik@greennet.gl

Internetikut nittartagaq: www.neriuffik.gl

Saqqummersitsisoq:

Neriuuffit Katuffiat - 2009 1. udgave, 1. oplag

Ilusilersuisoq: inuk Media ApS · © Assit

Quppersakkamit uuminnga nutsigaq: 'Kræft i Spiserør'

Nutserisoq: Kirstine Berthelsen, Johanne Olsen



Neriuffit Kattuffiat
Postboks 1546,
Aqqusinersuaq 48 A,
3900 Nuuk
neriuffik@greennet.gl
www.neriuffik.gl

